

知  
足  
齋  
文  
集

知足齋進

呈文彙目錄

第一卷

平定西域回部大功告成頌

謹序

平定兩金川大功告成頌

謹序

聖駕五巡江浙樂府

謹序

皇上七旬萬壽文

謹序

恭慶

皇上御極六十年萬壽文

謹序

御製裁者培之傾者覆之論恭跋

御製反蘇軾超然臺記說恭跋

御製回疆三十韻恭跋

御製十全老人之寶說恭跋

御製顯諸仁藏諸用論恭跋

御製小德川流大德敦化論恭跋

御製直聰明作元后元后作民父母論恭跋

第二卷

御纂續詞林典故序恭跋

御製毓慶宮記恭跋

御製才德說恭跋

御製勤政箴恭跋

御製樂取於人以爲善論恭跋

御製有大而能謙必豫論恭跋

御製邪教論恭跋

御書謙卦恭跋

御製復其見天地之心論恭跋

御製迎長至論恭跋

御製君子以虛受人論恭跋

御製恆以一德論恭跋

御製君子以懲忿窒欲論恭跋

御製讀臯陶謨恭跋

御書禹貢洪範恭跋

御製旣醉備五福論恭跋

御製能者養之以福論恭跋

御製禮與其奢也寧儉論恭跋

御書四箴恭跋

御書左傳楚武王侵隨一則恭跋

御書晉侯歸謀所以息民篇恭跋

御書荀勗省事不如清心奏議恭跋

御書唐呂溫頌姚崇誠宋司馬光蘇軾著錄一則恭跋

御製蘇軾刊賞忠厚之至論恭跋

御製存誠戒僞說恭跋

御製盛京頌恭跋

御製辛巳歲裁

太宗大破明師於松山之戰書事恭跋

知足齋進

呈文彙目錄

知足齋進

呈文彙卷第一

臣朱珪恭撰

平定西域回部大功告成頌

謹序

臣伏見

皇上執天樞秉神斷五年之間全定西極決勝二萬里而遠鏡照機張不爽毫刻籍伊犁縲名王蕩餘氛降諸部有罪必誅無遠弗庭發之

九重之上而收之八荒之外亘古以來未之有也

臣管

竊怪漢司馬相如作封禪文班固著典引其文理

奇而非事實或夸珍符喻封巒至于祖伊者臣素  
王尤不可爲典唐柳宗元作貞符及雅詩韓愈作  
碑銘然是時唐無他功憲宗平淮西耳千里之叛  
厘乃克之以爲如天之勲不可企及豈足語于

聖神之萬一乎

臣伏讀

御製太學碑文及

開惑論兩篇

睿畫大猷功歸

上緯蓋帝堯之欽昊有虞之敕命至矣曷以加茲

臣謹案

易稱大人與天地合其德又曰天且弗違言天固

人之所自爲也臣竊據事徵典作文一篇具道

天子之功德與

天合契者頓首以

獻其文曰

上闔昆侖凝爲廣輪其外環以裊海中貫星辰有  
攸天德爲天下君權輿龍翼蘿圖之紀不可得稽  
蓋靡顯于軒轅于是鞭應龍竿涿鹿五十二征天  
下砥屬少昊徠韃鞨顓頊絕九黎堯平九嬰之沴  
舜翦緡雲之裔姒子以來于傳可記也且夫德大  
者包天垓德小者疆地戒知有所不照時有所不

逮漢斬鄧支訖于羈縻唐棄維州築室道謀宋之  
有國北剝西副鄜延環慶原渭之外委之夏人謀  
手不敢西牧終拓跋九世而降于元元失其鹿明  
來犄之始藩哈密中葉而毀嘉峪關外亘土魯番  
亦不刺據乎西海瓦刺窟乎賀蘭近塞榆林北爲  
河套毛里孩火篩吉囊俺答蓋先後甌脫其閒明  
之守臣不敢偵瞭兩兒辨日孰胖近遠棄其玉斧  
袖手莫斷公卿訟于槐棘疆場割其土版戶楹不  
知遑問四方厥德弗馨

帝用眷命于我

大清也惟我

太祖以十三甲破葉赫輝發所向摧摺遂有遼瀋之陽至  
于

太宗長弓大鎧駕兩白龍鑒松山降朝鮮蒙古列部聯爲  
外藩功莫荊焉

世祖受之

天乃全付所有

聖祖旣拔三葉海訖天幹極西北隅有厄魯特部爲阿魯  
台之裔

天命蔡之

皇祖是用三駕

天戈稍平月窟取其鱣鯢而赦其劓刖也彼酋不悛窺我

西藏

世宗赫怒遂定青海莫我敢抗殲之于厄爾得尼招賊用

大創我

皇上日夜思

列祖之光明自

天榮鏡昭德之致于有萬方焉南溟金川雕題鬻首之國

莫不回面樹領企爲內臣

天將以準噶爾全部暨諸回國二萬里地授之于我

皇于是綽羅斯之內訌阿睦爾撒納之覓懼大小和卓  
木之陸梁所以

啓大功而擴我疆也夫時者事之鍵知者決之斷非鍵曷  
行非斷曷成當敏闢之麋至羌莫得乎要領

帝曰時哉操刀中宵爰麾兩牙騎阿爾泰山而下飲馬  
于河是時羊頭之銷未殷其鋒飛蚩之鏃未抽乎  
室犁伊犁庭俘大台吉若泰風之振擗大冶之爛  
雪易于承蜩而掇之也旣而拚螻蟻嘯彪螫忠者  
握節辨者守黑

皇帝不疑曰是不可不大殛再張

天軍罪人必得然後鍾山之子化爲鸚鵡負危竅竅自  
相灰爛首惡械相顧之尸羣狙驚會稽之箭墮坻  
破瓦無有存者從風而靡莫不歸我朝蟬封梟閭  
之長徠虎脊魚目之馬東西布魯古特娑奚繩橋  
之路復通右部哈薩克塔什罕蠻觸鵲蚌之爭遂  
捨重古九譯拜于

闕下與

天無極

功業豈不大哉彼波羅泥都霍集占者我之放豚出莖  
負塗背我大恩地荒城阻孰施長鞭

帝曰是戕我義臣不可赦原易將

授鉞

天討是申庫車阿克蘇烏什和闐以次悉平

王師電撤森發行萬餘里攻葉爾奇木未下退塹平黑  
水當是時賊眾數萬我兵三千守汧城而鑿穴飲  
疏勒之飛泉自非

一人辰居斗運天輪闢張先時輻湊強兵鐵騎儵眴馳  
驟曷克拔重圍而破勅寇若撲策而數計者豈非  
天授哉及乎大師長驅寇窘而逋置羅布天棄其室家乃  
收哈什哈爾葉爾奇木之民而窮二酋之所轢三

戰三捷至于拔達山傳檄授首所部悉臣子夜之  
尸異處相繇之身不環蕩雷轟以爲池平阿耨以  
爲田然後般師偃伯燔柴挈臯以告功乎

皇天也于是諸王三公六卿咸進曰

皇上獨秉天斷功成甚偉五年以來闢地二萬餘里伊  
古所稱無有倫比上

尊號協于

泰元垂之萬禩

帝曰吁惟

天之佑惟

祖

宗之志其克有成予其敬事諏曰

帝躬裸于

太室徧告

山陵暨

上下神祇名山大川咸秩酬功行慶莫不昭晰乃揆

天心攤日暹穹碑屹平岫嶁揚

大文之炎炎歸鴻名于

泰一參帝典以爲三惟乾乾乎終日式

上帝之所監日中必焚觀天執時有黃帝之明焉惟德動

天無遠弗届有重華之文焉震用伐鬼方三年克  
之有高宗之斲焉崇墉仡仡四方以無拂有文王  
之勲焉彼漢唐之所槩肇宋明之所揭擢又奚云  
乎

天道改穆無聲無言

聖人法之不息益勤惟動俟志有開必先雷殷龍見合  
謀于神虛而不有是爲乾元上摶流乎三光下配  
黎乎八蠻

天哉

皇哉

皇哉

天哉遂作頌曰

惟

天九重萬動之宗孰協于極我

皇之德衡氣發機克灼知之非惟知之

皇允釐之苾苾大地戒以山海同于

天光惟

皇德所逮彼咀西域獫莫之格闕彼白澤我孰而弗射

面

天者懷背

天者威或棹而芽火風其灰我出我師崑崙之西坡陀萬里今勞其歸非常之原莫敢或量今成大功

天心克彰祇翼翼敬

帝之則勅羣勞謙萬年無極

平定兩金川大功告成頌

謹序

皇上至仁天幃知臨幾灼神武乾斷初討金川服則舍之不訖厥誅旣而蕩伊犁收回部光

列聖之緒關地二萬餘里極天西北哈薩克布魯特鄂罕土爾扈特咸先後歸命內屬土圭測景至于日入之部枕矣旼矣古未有也乃促浸趨拉比惡背德

大師克之五年埽其窟巢罪人族俘功成大釐臣  
伏讀

御製平定兩金川告成太學碑文暨

勒銘美諾勒烏圍噶喇依之碑仰惟

聖謨淵齋

天佑信順靖民之勳一勤永救猶

心惻愀勞若將不及蓋堯禹之克讓克艱不矜不伐

大聖人用心萬古一揆也臣蒙

恩慈再入翰林欣覲

盛烈愧黤淺荒落無毫髮裨效注鳴翼振亦欲鼓舞

太陽太和之光氣竊不自量作闕

謨一篇庶竭摠愚忱宣釋

天子睿聖功德颺于無疆謹頓首以

獻其辭曰

天以大氣束九輪陰摯陽張亭毒嚙啍或戴景而  
衛跡或匿暎而巢窟馮生攬網孰溢靜是厥惟大  
君仁以均之知以先之勇以剋之有不若迪辟以  
止辟所以康兆民也故潰夙沙靡絕轡疇華誅三  
危竄有扈剿絕鬼方旣濟聖人皆祇之非得已也  
昔周舞庸蜀秦嘲牧犢蹊其金牟卽于白鹿漢開

四郡竿旄變俗淡入不毛葛姜之勞有唐不競運  
驕吐蕃麋谷清水要盟屢寒羌耽視平全蜀迺嫁  
婦于維州謀而取之城曰無憂牛李爭柄敝悉怛  
謀金川故縣小封更置王建徙州棄其地利割大  
渡以玉斧宋制險而不治元設碉門暨長河西明  
障雜谷鄰金川寺稍蠶食之聿遷其地夫金川者  
固三十三番之黑子而董卜韓胡之細也叩籠之  
巢攫公平上碕下碕牛皮之筏箭括乎沱水孫水  
繩橋縣度之摩曳白狗白蘭之脣齒連天萬巖絕  
地寸趾遠達烏斯之藏俯瞰井絡之底苟蠶尾之

有毒雖顛蘖其必掎

皇天啓佑我

國家自我

烈祖出震御天八紘八蠻同于太平

皇帝紹

重光求民莫兢兢乾乾無一夫不被潤澤惟十有三年金  
川用師則以促浸之蹂躪拉而澤旺獲也元戈西  
揭郎卡面革

帝曰宥之是我大造于爾金川而不利其壻也

天界所覆何遠不輳犁伊犁爲平川芻宛馬于內廐準夷

四衛屯田列侯其陽城郭至拔達山蔥嶺和闐實  
窮河源徵張騫之鹽澤辨篤實之火敦遂臨西海  
眞觀崑崙二萬里外國之西門徑乾陬而包坤角  
彼汶山華離之地曷足云乎然而

天絳旭卉機發必克趲拉首禍促浸背德澤旺昏而僧格  
桑世其凶卽卡死而索諾木稔其慝始則賢粟擒  
平鹿夢旣而剗女妻平無弋狼狽負屈而道命歷  
驢同難而薦食亂革布之室家躪躪什之疆域

天子以爲鞏金隄者堽蟻穴力原田者芟波莽不一勞  
不可以久逸不暫費不可以永寧師出以律否臧

是懲枕參首而

命將執螯弧以先登于是摧巴朗復革布資哩既克美諾入據篋兔走其三窟飛蟲懸于一縷姑句跳而從其妻迷唐號而夷其父方移金鼓于昔嶺詰罪人之逃逋賊乃善幻山鬼夜諄乘無備之莫敖戕致果之狼暉小往大來一發一斂

天將盈而殲旃故不可以五稔也當噶一路整軍而出

皇帝申命阿桂益汝吉林索倫黑龍江暨健銳火器凡兵七千惟汝定西將軍帥之時則天策電掣虎螭麋至六軍一心

廟算神契西南夾擊大風埽隧隕八卦之連雲剗兩宗  
于挾日再收美諾而趨拉之功訖矣

詔攝提格摩太一縫鑿天險誅魁凶馬尼南搏谷噶西  
縱宐喜絨布角犄肩膊西路大軍直鉞羅博色溯  
喇穆抵于默格忽超前而蹶後稟

九重之指撝鏡萬里如投籥康薩爾梁嶺粵劒鉞太古  
積雪嵯峨龜裂九鳥不照飛鳶顛蹙木思工噶谿  
笏間豁三年之咀一日而掇其時北師自日旁茹  
寨攻石眞噶沙爾尼戰河之西而大軍克噶爾丹  
及噶朗噶踞高而控低刷遜克爾宗加鞭尻睢仰

剗昆色火炎拉枯菑則大海燁燠池魚拔柵木以  
爲棧凌章噶而上梯遂披冷角寺次于勒烏圍是  
惟賊之舊巢錮重甌而獨牢矗經樓于天半礪卡  
傑僂而錯交困獸入穴層广外包五丁顧而躑躅  
九攻盡而莫挑于是槎林樹柵截河掾柝鉤鼉鼉  
而石筍折燧龍牛而冰崖鍛擁沙囊于上流鳴鼓  
角于地竈降天出淵神駭鬼瞑中秋之堅固靈鏡  
空蕩滌月崙蕭條天風鯨鯢他藉招搖奏功遂以  
夜半克勒烏圍捷書八日

聞于木蘭之

帷宮我軍合圍逼噶喇依跨梁踰溝先克西里乘其  
高標風怒火舉奪科布曲及索隆古舍齊雍中毗  
入庭戶南北兩路破竹解瓦埽獨松驅馬邦大會  
于麾下乃籍狸物火蟄獸投焚石砮天鰲纒橐駝  
鼪蠖蠓不漏煽鑪鞠于大冶鑠崑岡而裂吼爺穉  
鬪投絕其哺穀延焚額天罪大莫宥于是嫠嫗媿  
徒斑蘭精夫鳥語哀牢之母項髻朱戴之婦槃瓠  
則男女搖尾鄭瞞則舅弟駢首窮奴匍匐乞命曷  
刻乾隆四十一年春二月丙午索諾木率其兄弟  
莎羅奔甲爾瓦沃雜爾斯丹巴及黨惡大頭人丹

巴沃雜爾等就擒于軍金川平甲寅

帝方祇謁

東陵

驛桃花寺紅旗至惟

皇天

列祖孚佑

聖志中外大悅

神人咸喜

皇帝曰吁將軍阿桂百戰戴事功第一列爵上公有加

賜自副將軍以下論功封賞以差圖形

紫光閣相臣將臣冠劍鱗次乃徵

帝典敷

文思

銘太學之碑暨美諾勒烏圍噶喇依

天子穆然念康功甚勤而救

命之不易也一篇之中三復致意碣石鼓而汁五緯廟玉  
壘而表萬禩告功

泰陵

大孝繼

志扶

安輿啓華芝澤春淀延

蕃釐甘雨滲漉條風旖旎

日車東軌印大觀而愔

德威

登岱宗陋亭云告成

闕里偃伯秩文復租稅卻貢瑛養耆老甄秀峻旋

龍舟棹析津覽來牟之苗畬樂豐年之勇與孟夏之

月六軍凱歸乃

幸良鄉郊臺而勞之萬騎案隊饒螺震天狔甲虎嘖觀  
者如雲

皇帝謁

天受祉張黃龍之纛

御翠鳳之邸將軍前跽行抱見禮

天光霽穆

清問燕喜乃扈

鑾啓行馬上奏

凱歌三十章攤常杜之華琬韻勺節之鏤清鈞天雲門

訢合歡聲格子

帝京前期以索諾木及其人屬獻于

太廟

太社

皇帝乃御午門司馬牽組司寇致辟受俘于

闕下五月朔恭加上

聖母皇太后徽號曰

崇慶慈宣康惠敦和裕壽純禧恭懿安祺寧豫皇太后惟

億億年萬方咸

寧六合由

豫惟

聖母篤

天禱祐乃

頌詔天下告于

郊壇名山大川徧于羣祀行慶施惠莫不煦姬朝賡衢歌

雝雝平羣雅鏘鏘平九夏

訏謨定頌聲作乃爲遠人畏

德感

德樂

德三章之詩備鞮鞻焉畏

德詩曰羌氏石處雪霜之窟山巒蔽虧不見日月大夏  
洞凍不知寒苦

天威赫胥霹靂澍雨鑿巖築碣莫我堅厚塹江竿橋莫

汝險澗今何有哉蕩蕩戶牖趨拉函顙促浸族拘  
兄弟母孥長繩曳婁蜀之西北有大山海

皇帝治之亘二萬里傳告眾人東西拜跪

皇帝萬壽有向無倍感

德詩曰昔九土司日夜弄兵爾牙我肉狼藉壑阬革布  
什咱爲促浸斫掠其婦女娛娛熾弱彼鄂克什與  
趨拉讎埋蠱咒詛俾汝虔劉謂維州橋可以睚眦  
鵠鵬仰嚇

天奪汝魄

皇帝

天哉誅鋤罪人殪彼豺狼卹此寡矜自今以始我田我麥  
我羊我牛莫我辛螫毳毼班爵勃率蹈舞

皇帝萬壽心歸

大父樂

德詩曰峨峨岷山湛湛江水去天一尺江歸于海正陽  
化醇熙熙若春王哉林哉今爲內民夏有甘露秋  
無旨風冬日皞皞雪冰和融蜀土饒腴咸

賜復除赦過宥罪與民堅甦嶷嶷都護我鎮邊無時  
屯田我戍我保白狼槃木樂漢之大鳥斯梁甘丘  
蕃邏娑

天錫

皇帝覆育中外日月出入無有疆界

聖德高厚恩澤周布

皇帝萬壽與

天意合陳詩歌之

天人之孚四極太和嘉祥允符是故一夫不獲坐以待斲  
惟

皇帝仁榮鏡萬幾不應僉志惟

皇帝知勿貳勿疑九圍以鞏惟

皇帝勇百姓日用而不知

聖人之謨豈不容哉堯曰日慎一日舜曰惟時惟幾禹  
曰孜孜德先祗台故動則有開必先靜則中心無  
爲以至于萬年固我

丕丕基

聖駕五巡江浙樂府

謹序

乾隆四十五年春

帝幸江南浙江乎民望勤民功也

皇上法

祖臨民在宥榮鏡歲辛未至於乙酉

巡東南者四自是以來億兆延企慕思俟

翠華之景光者十有五年乃得

報可先是濬陶莊引河成既有事豫河

上渡黃之日

躬禱於河伯厥明決口就塞河復其道若合符劑於是

淮徐所在堤堰

命以時次第修築而浙之海寧魚鱗各塘悉發金鍵后  
親臨籌度釐舉

指定奠萬世功謹案周禮肆夏詩時邁也曰及河喬嶽

般曰允猶翁河言王者巡狩四嶽河海高高下下  
陂障宅居非尋常行慶施惠之事也若夫

湛恩疊沛

賜蠲復租巨億萬計禁繁奢減流就問耆年登髦秀官  
士軍商周覃涵浹恭逢

天子七旬萬壽純嘏蕃釐俾大江南北海隅蒼生親覩  
穆穆叩叩之輝自朝至於日中旻勤勞民庸至誠無息  
者如此皇哉萬古未有之

盛烈也

臣蒙

恩備員

清禁未與扈從

屬車之塵竊揣萬姓鼓舞抃躍宐有擊壤華封之辭

可附聲律者謹擬迎

鑾樂府十有九章以

獻其詩曰

皇釐純撫極和由庚五臨桃被八風宣行四十五年  
壽愷曼聲衡殷南斗河江緯經天樞地奠兆人叶情  
鸞鈴葩瑤肅離觀聽

右一章十二句

帝臨

紫壇元日卜辛皋搖旭卉穀我下民

象載畱俞

龍聽發昕民曰曠哉十有五春旬服鉅秸拜  
賜復仁視邇暨遐膏露酌酌

右二章十二句

濟水流淵淡方山秀列施望秩于岱宗軌道經下  
汴五汶灑異源泗沂輸同委青陽汎滲漉齊魯榮  
俶始時哉鳩鴈聲

清問古郊里耆嫗何熙熙康我耕與耔

右三章十二句

大河混混東南趨清口歆飲淮泗俱陶莊隄外八  
百丈引黃北注廝長渠

仁皇六巡親指畫雲梯直下神哉

謨年漢填闕待疏瀹功成

聖睿

天所俞

禹碑手紀四載績蛟龍蜿蜒行歸墟

躬臨河防更跋履允猶般頌隨葉書

右四章十二句

中春十日

帝觀于河惟儀封未塞豫之民以咨嗟謂爾河伯璽玉

禮有加

至誠俟志順風涌沙架鼉枝櫓連鼇盤挈千里一息赴  
壑就科

天佑神相冰蠟舒波慰我

宵旰憂勤實多

右五章十六句

淮水湯湯禹州惟揚湖浸璧社山綿蜀岡萬竈沸  
海干飄轉檣施舍已責

惠農及商天喬蔭藟平山堂衢尊羅舞聲發梁節以制  
度阜且康

化南自北慶入疆

右六章十二句

龍舲發瓜步鵠首迎澄瀾青山忽近遠天水浩已寬紫  
金屹中流蓮宇高空攢倒茄鏡無帶犴天出椽欒  
堯心一登攬六合愜大觀列睂指焦固辨樹檣江干

右七章十二句

徑銀蒜挖京峴曲阿洄夾岡衍籥金牛眺黃嶽披  
芙蓉梁溪淺錫惠駢漱鳴琄翳

華芝蔭芳蘚

右八章十二句

虎阜兮坡陀華山兮窳窳通門開二八茂苑疏曲

沼天平上靈巖具區俯瀟漾五車星氣聚

六御龍光繞三江放東瀛涵浸日月表吳歛起滄浪聲  
孔樂魚鳥

右九章十二句

吳越同星嘉禾壤錯女勸蠶桑農勤簞簪烟雨空  
濛鴛鴦秀綽玉帶灣還車溪噴薄春風嘒嘒芳涇  
蘼萼浙西唱于

恩先咨度

右十章十二句

白塔激浦口赭山浙海門疾雷乘噫氣齧岸春沙

痕柴塘榷石舊歲久撼厥根

帝厯濱海民爲爾安墮螭

疇咨今已五良趾義取敦萬年計磐石工大誰能論魚  
鱗盡脩築坦迤排山限遙臨鳳皇麓輦若鳧鷖臺  
右十一章十六句

浙山娟娟水滿汀湖光江色搖空青面湖窅窅洞  
天闕近挹遠取皆瓏玲寶石寶雲接葛嶺靈隱靈  
鷲低南屏鳳岡遙戛萬松葆龍井倒汲風篁瓶迎  
潮未擬白鷺下擊水已運垂天翎圓窓噓氣豁  
睿照安瀾底續符

清寧

右十二章十二句

覽浙水兮右旋溯大江而東上馴敦圉於石城擾  
之而兮鍾蔣梅岡芬其雨花天闕屹其抗掌絕秦  
淮兮委蛇睪龍潭之岡象眇六代其紛員稱殷禮  
於肸蠁

澤湧渙乎江國

施南陽而北燼

右十三章十二句

山陽西南隅高堰鍵其阨北當淮泗衝南搃漕湖

噓瑄馴所脩擇遠陷元龍蹟圖彼洪澤寬誰鑠支  
祁魄咫尺距青口高汗導桐柏

皇來繩

祖武

念茲濱廣斥金隄以次完璧甃易堅石長令淮表民畋  
田宅爾宅

右十四章十六句

河延道兮鼓城東交挾汴泗瀉雨洪黃茆岡起雲  
龍麓蘇隄蹟與戲馬同舊川旣歸建瓴下切和地  
防紆

天衷蜿蜒左右蕭陽近噓喻消長淮海通韓山奎山石

堰接分

命圖度求康功

琰文大書記河復黃樓何事誇元豐

右十五章十二句

帝咨岳牧惟河海奠居鞠人謀人非山川是娛東南隅

喁無已麗奢土事勿飾木事勿鏤

頒金太府

賜所過租全復

驛所溥弛舊逋百司伍士拜級受精存問覲飴肆赦皆

辜功宗成秩旣于幽遐

大澤摶流蹈舞康衢

右十六章二十句

三江揆厯則羣雅多和聲雲河傾

天藻風草抒下情陳詩達夏諺奏賦擬漢京蘭芎擢

秀菁茅彙以征學校廣弟子科第開已庚作人

壽胥試賀世鐸先鳴

右十七章十二句

大圜垂精三辰光華大塊剪與萬寶紉牙文思

堯暢文明

舜歌瀏覽民風疏寫性和

龍書穗篆名山刻摩敷言

皇極矢音卷阿

右十八章十二句

帝車般兮

駕赤龍壽星大角行天中河游五老邀海童上下騰躍

第祿豐

五巡江外祉函蒙

七十萬壽勤

天工

天道下濟如張弓庶民惟星如雨風日光月輪囷于東

萬年

聖德歌

乾隆

右十九章十句

恭慶

皇上七旬萬壽文

謹序

乾隆四十五年八月恭逢

皇上七旬萬壽普天禔福

臣

伏讀周書洪範九五福一

曰壽唐孔穎達正義曰王者思睿則致壽言壽爲

五德之本思爲君主之官猶黃鍾之宮召和而凝  
命也堯典曰欽明文思安安皋陶贊舜曰慎厥身  
修思永然則詩書所載聖主祈天永命必有所以  
致之者也

臣沐浴

壽宇蹌舞

太和竊忘其鄙陋作睿繹一篇推本

天子睿聖之德徵乎文章功烈之盛而篤無疆之

天祐者誠足陶甄唐虞而鞏

景命於億萬年矣謹拜手稽首以

獻曰

遂初大赤含孳中黃紐牙細縕摩盪孰宰孰樞三  
辰經天綱爲斗車六味甲地埴壤黎壚人統乎聖  
思通乎虛不息則久與天地俱遠哉三皇五龍之  
紀訖於赫胥尊盧或以二萬八千歲始或以千二  
百歲修或以三百年著蓋遐邇寥闊而不可典據  
孔子刪書斷自唐虞放勳重華粵稽而知敕天之  
命思日孜孜周公作無逸述享國之本在知小民  
之依厥後太元神策覲七十二代唐志上瑞名六  
十四事祥符眞喋參百冊八繪乃陞九疇而尊七  
緯憧憧摺摺豈曰睿乎我

大清受

命乾確坤固

皇上握三才之榮鏡宣

五聖之光燭濬哲性成緝熙學歌斟元五期統天六御穆  
穆純純宥密旭卉中夜以

思呼吸

帝謂乃圜鍾假

天神商鍾出

地而肆獻裸饋食慤於四時松雲優氣永言

孝思至德爲本津根篤枝

思我

國家肇基大東

創業顯庸長白松杏鳴綠混同

賦盛京而

三謁敘薩爾濟戰功揭艱難

神武之烈貽厥無窮

思在昔渠迪篤記功宗乃惇敘親賢闡幽紹封因心繼  
志德厚信仝

思萬幾惟一日二日昧爽丕顯日夕不遑暇逸以渙  
大號而在治忽八紘之張猶省括也四門之闢猶庭

也

思民惟邦本日雨日暘洽風清馴

祈穀

大雩藉田墦畛省歲所在方隅水旱則大發金穀以振之  
遂

賜蠲緩巨億億萬

特詔普復天下惟正之供者數焉損上益下大賚之  
曠典也

思五方之民必

躬親覽觀乃周知其隱自畿甸而近北獮木蘭東秩岱

宗

詣闕里於竟涉淮而江

巡於吳越西隄五臺中嶽太室百年熙熙歧

翠旱焉捷石沈玉黃復其道廝渠引河淮淡於堰掇潮

築碣海平於準康功田功萬世永賴則

心勤而猷遠也

思覲

光而揚

烈在詰兵以講事秋獮冬閱纒橐載旆射鱣魼鏃驅肆西

征不庭洗馬月嶠組名王於

廟社箴

兩朝之撻伐伊犁厲揭和闐壁厥疆拔達山闢二萬里至  
於大宛康居崑崙條支犇河源而臨西海井絡之  
隄金川負嵎再舉盪之粟入其阻  
德威所屆六合一家乃敷

文思覃

文教天稷濬源天葩揆藻信

天開惑之論太學

告成之碑百六全韻之體七十二候之詩

御製四集海富日新莫能究窺

開經筵闡史奧蠱三閣之津淵緝四庫之薈要惟

聖多能龍書雲畫同文九譯又極游藝之神妙也於是  
天子淵然而思曰予承

天釐保民極者於今七十年敬之敬之其敷錫厥庶民乃

增甲乙之科下鳳皇之

綸庚子元日宴醑飫

恩

詔書二十遐邇合祈春

幸東南中夏

蹕旋格於

北壇

皇帝曰嘻天下其勿以介祉爲事奢侈華紛予將莅乎  
山莊避暑之宮時則老人出丙重輪麗天梯航麋  
至鵜鰈來瑛乃有岡底斯山日喀則城曰班禪額  
爾德呢越萬里而用賓昔在崇德固始識

眞人之興朝於順治達賴荷金印之

頒百卅年而再至祝

純嘏於

聖人以大梵音演無量義遂說偈曰頂生大輪王治世  
八萬歲地味如醍醐如生酥如蜜四寶須彌山阿

耕達池水頰胝師子口流出徒多河爲閻浮提源  
浩浩注東海奔荼利迦華香聞大千界如兜率天  
壽五十七億萬他化自在天九百億萬歲非阿斯  
陀果不作壽者相

皇帝大功德福不可思議於是秀眉顴齒國老庶老文  
學博士鞠跽同聲而稱曰天地恆久我

皇體之人情爲我

皇理之奉三無私

一心無爲不思而得萬福純熙四極之和交鬯中外之  
歡允洽

天子方定

天保觀日焚鏡至中勤駿業斥奢崇儉

示民無乏

至德不德戒之罔挹

思難圖易在宥成燮鈞鎔仁壽喜氣濃浹心之精微崇

效卑法

萬年疊疊自

天佑之惟

聖睿哉惟

聖壽哉

恭慶

皇上御極六十年萬壽文

謹序

臣竊惟尚書紀帝王之政惟堯舜尊之曰典典者常也萬世不易之法也故曰天敘有典又曰有典有則貽厥子孫又曰其爾典常作之師孟子曰堯舜之道不以仁政不能平治天下惟堯舜立人君之極故萬世帝王咸取則焉今觀二典所載堯則明德親族平章協和欽若授時疇咨諸大端舜則齊政類禋巡守封濬欽恤詢岳咨牧命官考績諸大端歸歸煌煌萬世由之則治違之則亂心法治

法一以貫之故曰典也欽惟我

皇上臨御六十年

心則堯舜精一之心

政則堯舜欽明之政

巍功煥章烜赫緝繹載筆者雖磨鉛重軸掛一萬漏若

以勾股測天窮於摘管坐井之技於大圓之量不

能闕摹分寸也顧

臣竊以爲我

皇上實心純德邁古式今憂民之憂樂

天之樂作

君師之則垂燕貽之規有確然世世遵守而不可易者

乾以易知坤以簡能斯之爲可久可大之常道矣  
不揣弁陋謹作

皇典一篇以

獻曰

皇帝同

天協德曰純誠仁哲剛健文明信

天若

天孜孜惟厘不息而日新歲舉三大祀

祈穀於上辛日在畢而

常雩日南至而

郊北至禮乎

方澤必躬必親徹幄幕而耕

帝藉中祀而平

八旬夙夜基命克迓

蒼眷曰信

天主人曰雨而雨曰暘而暘步禱於

壇曰惠雨乎蓋寅籲而辰霈若觸石之泰雲自初哉齊見

上帝默祈曰予承

天承

祖惟保極至於六十年乃

古稀

八徵允符初願不倦於勤其在易曰先天而天弗違後  
天而奉天時是以自天祐之吉无不利也

皇帝紹衣念

祖追遠繼

志夙興恭讀

寶錄周而復始肆獻裸饋食時享月祀四謁

盛京長白望秩

天作高山穆然遐思

詠薩爾濟松山杏山之戰追憶墮淚

五朝冊寶琢以和闐之大玉冠服騎射之

訓守于世世東西上

陵感霜露而孺慕逾耄耄而懷愾

御寓符平

仁皇總

祖武而匪解其在詩曰永言孝思孝思維則所以鞏  
世祜而孚

天載也

皇帝至性至行篤于

慈寧問

安先意視無形而聽無聲以天下養者六十有七年奉  
安輿而上

壽合海嶽而承

歡泉乎永慕若將終身執禮過平曾閔誠孝動乎  
天人推

恩錫類四極歸仁所以地察而天明也

皇帝惇敘九族仁治義周十一世之瓜瓞見  
七代之茂苞

賜四品之冠帶燕龍光于蓼蕭復睿王之崇封記功宗  
而不祧興滅繼絕微顯闡幽

仁厚鍾于麟趾

五福五代

拊元孫而逮雲仍樂千春與萬秋所以繩繩引翼世德

作求也

皇帝萬幾勅

乾綱獨挈日

召臣工宣播

綸綽

闕門聽治昕旦

批札辰請已報不畱晷刻引對守收

清問愼讞

先覺之照如神小大之情必折知人器使揉枉陟黜九  
域萬邦不隔戶闔是以中外允釐而曲成萬物也  
皇帝以

天爲心保民如子省歲從星鞠謀暄雨

賜復漕糧者三

恩免正供者五調緩賑貸巨億萬萬正月始和先春奠  
與今歲

詔豁積逋二千萬有餘

特恩周溥

六巡江浙若晉豫齊魯所至曰

幸問民疾苦河防蜿蜒海塘齟齬

指授奠濬功邁神禹肆赦繫滯空厥囹圄是以民氣舒  
而國本固也

皇帝生知

天縱好學時敏

詩文富有充棟連軫

著論經史抉聖精蘊實事求是元元本本通六方之音  
字細七閤之編簡

經筵百篇

手書

御撰石鼓石經碑雍列建西安西而東灤陽新學宮之

嚙嚙

恩科十四作人造選鴻博經耆之舉獻頌異等之雋披  
華振實鳳翽虎鸞是以萬方黎獻歌岡阿而鞬轂  
輦也

皇帝智勇

天錫

神武龍首肇十二齡而行圍發二十矢而中十九歲  
蹕木蘭朝列藩而獬豸兩平金川再定伊犁遂砥回部

至於西海二萬里外皆爲我有緬甸歸其象馬安  
南佩我印綬廓喀降而金瓶

頒臺洋靖而鯨鯢摺原燎草薶不數萑苻之小醜是以  
功成十全而篤膺

眷厚也

皇帝德盛功峻禮明樂雖

定列代帝王之祀以尙賢也

賜勝朝守節之諡以顯忠也貳臣有傳以勵貞也勳臣  
必世以酬庸也開千叟宴

錫嘏徵也譜三百篇正雅風也是以

制作大備而

教思无窮也

皇帝心堯舜心誠一不息心

天地心與

天合則四知惟幾四得惟德超六帝之壽康絕八紘之稗

謠

五福集而不去憂

十全成而猶戒得其枉益之九五曰有孚惠心勿問元

吉有孚惠我德言損上益下聖人所以懷萬國也

記曰動而世爲天下道行而世爲天下法言而世

爲天下則是以

垂裕无疆謚

天庥而保民極也頌曰

惟

聖法

天惟

天佑

聖堯舜同符仁心仁政

八徵耄念九敘先憂觀

天觀民萬世率由遵之盡善明明顯顯綱舉目張是之謂

典

皇哉典哉堯中舜性體之惟誠行之惟敬願以斯典垂  
億萬年

天信民順純純乾乾

御製裁者培之傾者覆之論恭跋

臣惟天道無心而成化聖人有心而無爲一陰一  
陽之謂道天不能有陽而無陰也文子武取德孚  
刑明聖人不能張文德而弛武刑也孔子於復之  
彖傳著之曰復其見天地之心乎而姤不言者體  
好生之德而貞元姤復之循環可默而存也欽惟

茂

皇上備德在

躬與

天合撰是以

天篤我

皇位祿名壽陪敦立一輦方增無極而

皇上體

天之心杭被六合

恩浹威覃兆民萬彙鼓舞薰蒸於

仁壽之世伏讀

聖論敬知因材而篤栽培傾覆之所以然

天緯

聖心純合而無間有如是也

御製反蘇軾超然臺記說恭跋

欽惟我

皇上心學精渙得一貫萬正內該外之至詣非前賢遠

觀超解之說所能較量涯涘也顧

臣

淺陋愚蒙何

足以窺測一二乃蒙

恩旨鈔寄閱看

臣

榮幸蹈舞心開目明百讀研思眞發

蒙而釋結竊

臣

識解庸鈍亦嘗體認心理守內以

患遺物逐外則恐累心每扞格而不能融洽也今  
伏讀

御說以蘇軾遊於物之外爲雄高而無用不如遊於內  
以求正心之本而會天地萬物爲一體大哉

聖言一哉

聖心是堯舜孔孟之心傳而

發萬古不易之精蘊也孔子之言心莫著於易於艮言  
心之體曰君子以思不出其位於咸言心之用曰  
聖人感人心而天下和平而其自言曰從心所欲  
不踰矩孟子善言心曰心之官則思先立乎其大

者夫惟盡心於內而外不遺是以無外非內而內  
不擾也堯舜之執中孔子之從矩孟子之立大皆  
所謂遊其內者矣我

皇上萬幾勤平宥密至誠格平

天人

功巍文煥中位和育而

純亦不已之心無間於一刻也竊謂彼遊於外之超然  
非眞超也告子之不動心也惟遊於內之超然乃  
眞超也孟子之不動心也聖人之憂民如此舜禹  
有天下而不與一心而已矣蘇軾學莊周家之言

烏足以與於

大聖人心得之精純也與

臣

曷勝欽悅誠服之至

御製回疆三十韻恭跋

臣

謹案西域自蔥嶺以東天山以南南山以北其  
國五十餘城漢屬都護者羈縻而已未能盡有其  
地也唐時回紇屢爲邊患鳳林魚海閒詩人尤三  
歎焉欽惟我

皇上聖德神功與

天無外蕩平準部底定伊犁倖大小和卓木於拔達克山  
而古莎車于闐疏勒尉頭溫宿龜茲焉耆依耐諸

國土悉入版圖畏

威懷

德傾心內屬於是除準噶爾之苛政沛以

新恩與之更始漸摩淪浹三十年而

仁道化成若是其盛也旣溯河源於阿勒坦噶達素齊

老以証司馬遷班固之是而闢唐宋元之譌

功巍文煥至矣

臣

茲伏讀

御製回疆三十韻

奠定其山川則禹貢之卽敘也

考辨其貫利則職方之九服也

先知艱難而無思不服則書之無逸而詩之有聲也信  
天順民而勞謙保豫則有大而能謙大易之精蘊也肅穆  
典則與六經相發明誠篤祐於  
昊穹而

垂裕於萬世之

謨訓也歟

御製十全老人之寶說恭跋

臣聞堯德廣運惟四舜大功有二十禹無間然者  
六伊古聖人亮天熙績純純常常舉其大端可概  
而述也欽惟我

皇上德凝五福功隆十全邁八帝之延洪廓四極之聲  
教超鑠萬古獨膺

天篤大順大備豈可以數紀而量測者哉

臣伏讀

御製十全老人之寶說仰窺

皇上巍煥不與之

聖心竊謂

三郊精禋

雩霖響應開先不違自我視聽則事

天之全誠也省山

肇基紹

庭繩

武顯承

謨烈

八旬敬慕則繼

志之全孝也篤敘功宗本支千億

五世一堂燕貽蕃錫則

親親之全仁也

闢門疇咨

鏡照萬里彰輝執中

乾綱坤紀則

御臣之全明也四瀋正供賑發無算冀海翁河思艱

宵旰則

勤民之全惠也

恩科十四耆英千叟壁廡園橋麟郊鳳數則

教育之全澤也

詩文萬表淵源七閣石鼓石經

崇論廣說則

文德之全富也闢疆海西洗兵天外佛土咸皈金瓶世

資則

武功之全靖也

八徵用念九疇用嚮期頤懋勤萬齡

天貺則

福壽之全轅也四知惟幾四得惟德謙謙有光

乾乾不息則

心學之全純也遽數悉數掛一漏萬日新又新

光華旦旦蓋一日二日萬幾五十八年以來至於萬年

無極也天全乎大圓而九重十端不足以測天地

全乎大輿而九土十形不足以畫地

聖全乎大德而九如十有億兆京咳不足以紀

聖也惟精惟一惟日孜孜

皇哉

聖哉

皇哉

天哉

御製顯諸仁藏諸用論恭跋

臣惟太極兩儀動靜互根以成一闢一闔之妙顯  
仁藏用一而神兩而化者也聖人同體天道純亦  
不已精義入神卽所以出而致用利用安身卽所  
以入而崇德成己成物合外內之道也我

皇上握樞建極

崇德

廣業貫天地民物於一中德發揚詡則大聖物博於穆  
緝熙則純粹以精

聖人內外貞一過化存神所謂帝堯同天魏功煥章皆  
心法也伏讀

御論顯與藏內外如一方能合天地萬物爲一體

聖人之蘊昭乎窮神知化之盛矣竊思仁者內也而何  
以言顯用者外也而何以言藏陰陽無端乾坤互  
宅唐虞之執中孔子之一貫我

皇上身體之而切言之故精義實有超平先儒註說之

表者非固聰明聖知達天德之

聖曷足以與於斯

御製小德川流大德敦化論恭跋

臣惟天地之道本乎太極而貫乎五行四時萬物者也莫顯於易孔子之贊乾曰大哉乾元贊坤曰至哉坤元懸象著明莫大乎日月變通莫大乎四時舉八卦而六十四卦三百八十四爻該之矣舉坎離而八卦該之矣坎離之中卽乾坤也乾之用九卽坤坤之用六卽乾舉乾而坤該之矣故曰一也聖人法天曰一日二日萬幾曰惟精惟一曰協

于克一曰一以貫之天地之德無大小一也聖人之德無大小一也故曰純亦不已我

皇上體

天之心與

天合一六十年孜孜不息

八秩開五而乾乾終日者又孰能窺而析之曰此爲川  
流之德此爲敦化之德哉詩曰於緝熙單厥心夙  
夜基命宥密非天下之至健而至一者不足以與  
於斯

御製寬聰明作元后元后作民父母論恭跋

臣案言聰明者始於皋陶曰天聰明自我民聰明可謂言之切實者矣泰誓之言可與洪範參觀二五事三曰視四曰聽視曰明聽曰聰明作哲聰作謀曰無有作好無有作惡曰天子作民父母以爲天下王夫父母之於子視於無形聽於無聲有百倍於子之事親者大學釋民之父母也曰民之所好好之民之所惡惡之而洪範則言無有作好作惡是非自我民聰明之眞脈歟好惡惟民而我不自作聰明自民而我不自作是之謂亶是之謂父母之心也我

皇上明鏡萬里聰達億情而一本於信誠此體

天地之慈而保在宥之蒼赤者也所以不逆億而先覺無  
偏倚而建中者歟

知足齋進

呈文彙卷第一

知足齋進

呈文彙卷第二

臣  
朱珪恭撰

御纂續詞林典故序恭跋

臣聞敷政官人之道有本有文無本不立無文不行故文學之士贊經綸敦教化成德達材不可闕也有勲華之文思文明則有岳牧元愷之謨彌有妣姬之文命文德則有皋益周召之賡揚漢之文武光明則天祿石渠明堂辟雍之禮樂不勝書也唐之貞觀宋之嘉祐則瀛洲北門玉堂寶文之清

切有增美也蓋際日光雲倬昭回于天穆明緝熙  
觀會于運

聖

聖同揆經緯在宥從未有如

今日者也欽惟我

皇上躬日新之德懋時敏之修武功告成文教敷洽天  
元周乎甲子人文同乎河洛典章該備六十四卷  
書成取進辰請而午發巍煥弁言揭其體要教以  
根柢大哉

皇言傳示遠近臣民孰敢不敬應而鼓舞砥厲哉

御製毓慶宮記恭跋

臣謹案龍樓躍淵之地鶴禁升霄之所天命貞符  
非覩聞所能測度也我

朝慎簡

元德以爲天下得人爲仁

純皇聖睿通乎帝謂然猶面稽天若申卜再三至癸巳而  
告諸南郊癸卯而禱于

列祖乙卯而始宣諸四海蓋

天位主器如是之鄭重也立儲之日中外歡嵩天人慶  
洽丙辰元日重光重輪授璽于我

皇上以毓慶宮爲重華之協

訓政

聽政者三年所謂繼德者如是之久而化成也

皇上以爲立萬世之大防基萬年之大福者在是大哉  
聖謨德者福之基民者命之本毓慶者毓德也祈天永  
命者得人而安民也金鑑玉契卽丹書無逸之懸  
心目也瑤山長琴卽夏啓周文之敬承繼也雲牖  
松棟見羹見牆先天後天昭乎如揭日月于億萬  
斯年矣

御製才德說恭跋

臣聞洪範曰有猷有爲有守守者德也猷爲者才也孟子曰人有不爲也而後可以有爲是貴德之說也咸有一德曰任官惟賢才左右惟其人臣爲上爲德爲下爲民其難其慎協于克一而歸本于一心曰大哉王言又曰一哉王心是本末之說也虞廷莫大于治水然鯀汨陳其五行則九載績用弗成禹修鯀之功而至于地平天成萬世永賴其自言曰祇台德先不距朕行豈非德全而才裕彰明較著者哉我

皇上于用人行政之間深知其難而發爲才德之說天

下知

聖衷之所向不敢矜其一才一藝而勉于守以達于猷  
爲則不敢以無德之才自欺欺人并不敢以無才  
之德拘墟自安于無用非鼓鑄天下人才以收器  
使之效歟

御製勤政箴恭跋

臣惟乾之象傳曰天行健君子以自強不息蓋乾  
備元亨利貞之德故二三四五皆有君德而六位  
時行則勤莫勤于乾之不息矣其餘備四德者六  
卦坤屯隨臨无妄革皆臣道也因其時合其德則

能承天而輔化所謂克勤于邦業廣惟勤民生在  
勤者合上下之道也書曰君子所其無逸所謂勤  
也詩曰夙興夜寐無忝爾所生故曰勤則善心生  
也我

皇上朝夕乾乾與天合度故一日二日謹于萬幾而緝  
熙純嘏氣志丕應者用凝承昊綽鼓勵百工四方  
億兆皆仰

一人之心孚而躬教臣等敢不敬寅翼爲于下以仰副  
聖主之勤求治理于無斁也歟

御製樂取於人以爲善論恭跋

臣惟孟子稱子路聞規過則喜禹聞善言則拜一  
勇于改過一誠于好善而尤以大舜取善與善爲  
大蓋言善量之無窮也故曰舜之居深山無以異  
于民物也及其聞一善言見一善行則若決江河  
沛然莫之能禦也可爲善于形容者矣夫有人我  
之見杼則不能若己有之舍己從人雖勉而好善  
其所取者僅矣惟樂取于人者斯能與人爲善是  
以天下之善皆歸焉執兩端而用其中此惟精惟  
一之心傳也伊尹曰德無常師主善爲師善無常  
主協于克一此所以合衆善爲一善而化天下于

同善也欽惟我

皇上虛己察言從善如渴故無不達之下情無不照之  
衆志

御論所謂見善必取取善必備者

聖人之心昭乎揭日月而示臨觀矣臣竊以爲成己成

物時措咸宜者明善誠身之要功也克己復禮天  
下歸仁者希聖希天之眞學也

皇上本聖賢之極功臻誠明之神化天下蒼生之福萬  
方黎獻之願也

御製有大而能謙必豫論恭跋

臣惟大有之象與乾爲體君子以遏惡揚善順天  
休命其上爻曰自天祐之吉無不利孔子繫之傳  
曰履信思乎順又尙賢也是以能有大也有大而  
受之以謙則堯舜禹之有天下而不與不矜不伐  
謙所以尊而光也裒多益寡下濟光明虛己而受  
萬善恭儉而本一誠節用而愛人德盛而禮恭此  
有大而謙之實也如是則必受之以豫矣豫順以  
動故刑罰清而民服役使羣動而不應後志所謂  
由豫大而得也此序卦自然之效有其德乃僉其  
福也欽惟我

皇上兢業體乾虛公無我斥豐亨豫大之非厯保泰持  
盈之念以謙儉慈爲寶以時幾敬爲常以誠事天  
則雨暘不違以誠勤民則風草從化以誠應事則  
氣志如神伏讀

御論所謂以天地父母之心爲心者大哉

皇言真先憂後樂仁民愛物之

聖學也

御製邪教論恭跋

臣聞有教無類聖人之廣大也又曰道二仁與不  
仁而已矣仁與義二者一也害于仁則非仁也放

于利則非義也王教之所不容也王制曰廣谷大川異制民生其閒者異俗修其教不易其俗齊其政不易其宜又曰析言破律亂名改作執左道以亂政殺王政之大端也君師之統一而已矣所以持世而正人心也二氏之說殊途而同歸苟違其本旨儒教豈不嚴亂賊之誅乎大哉

皇言官軍所誅者叛逆也未習教而抗拒者殺無赦習教而在家持誦者原無罪也自違教與叛逆不同乃顯而易見之理聚眾斂錢流爲不靖是在良有司實心化導眞扼要之說也臣以爲欲人人皆正

其心惟

大君正一心以正朝廷正朝廷以正百官正中外以正四方則從欲以治誰敢不革面革心以違天取罪乎如有違者以刑從之則不怒而威于斧鉞矣此所謂禹湯克己之心先聖

後聖其揆一也易曰與天地合其德先天而天不違後天而奉天時天且不違而況于人乎此必然之理也

皇上之心卽天心也至誠而不動者未之有也臣敢拜手心說誠服而敬跋以申其說不勝惶惕之至

御書謙卦恭跋

臣案地山曰謙以山之高而處地之下有其實而不居其名謙之至也謙內卦皆言吉外卦皆言利所謂六爻皆吉也至于利用侵伐利用行師然則戰伐之事亦必以謙爲貴矣書所謂滿招損謙受益者也而九三爲卦之主一陽統五陰曰勞謙君子有終吉象傳曰勞謙君子萬民服也則惟舜禹之有天下而不與不矜不伐故成允成功帝王先勞無倦而欲如不自足曰予臨兆民懷乎若朽索之馭六馬上畏天下畏民謙之誠矣夫是以天佑

之民順之不言利而利積不期功而功成謙之受  
益也如是我

皇上日勤萬幾心勞兆庶不自以爲已治已安也是誠  
所謂謙尊而光勞謙而萬民服者也

御筆書此以當箴銘誠天下無疆之慶也  
御製復其見天地之心論恭跋

臣案復德之本也是以王弼釋復其見天地之心  
平以爲復者反本之謂也天地以本爲心者也故  
動息地中乃天地之心見也朱子以爲積陰之下  
一陽復生天地生物之心幾于滅息而至此乃復

可見在人則爲靜極而動本心幾息而復見之端也是二說者一以爲靜極爲心一以爲靜極而動爲復見之心所謂仁也故天地絪縕萬物化醇言致一也一者誠也所以不息也仁也所以生物也此天地之心無時而不見而聖人于此特發明之所以見天地之心無刻不昭著于乾元之始也繫辭曰復以自知王者中心無爲以守至正敕天之命惟時惟幾蓋其道心常爲之主灼然自見于獨知獨覺之中以戒慎養其源以謹獨知其幾則所發皆與天地合德而同心故天地位而萬幾理也

皇上與天合緯觀萬象于宥密之基而握至靜以涵至  
動焉其卽北辰居所之義乎天地之心卽乾元也  
卽坤之直方大也其見端于七日之來復徵之萬  
善之所由生也洪範曰五皇極皇建其有極斂時  
五福用敷錫厥庶民其惟

聖人以天地之心爲心故能立心而立命也歟

御製迎長至論恭跋

臣聞郊之祭也迎長日之至也大報天而主日也  
聖人于天蓋有以知其渙矣夫天循環乎赤道而  
萬古不息日循環乎黃道而萬古不息然而日與

天會則一歲一週必于冬至之度取齊焉極長至  
于東井極中分子二分而極短則會于星紀以是  
爲天地之始焉迎而不見其端故曰天以爲正周  
以爲春陽氣始萌于是有蘭射干芸荔之應又冬  
至則斗北中繩陰氣極陽氣萌故冬至爲德鍾律  
權土炭冬至陽氣應土炭輕而衡仰天地之氣至  
信故曰中孚揚雄之言曰陽氣潛于黃宮信無不  
在其中是也夫十月謂之良月又謂之陽月十一  
月謂之暢月蓋地之積也不厚則其胚胎也無力  
故亥子之交坤復之際所以終始平萬物者

以先天而天不違者也迎之義也我

皇上敬天誠格迎日受釐蓋有呼吸通乎帝謂升恆兆于幾先者故于迎長至之典闡發精蘊有非經生所能窺測萬一者故曰堯之所以聖德同天故能欽若昊天也陽者君象也陽復而君象彰明蓋有堯之德則帝德廣運巍乎煥乎無不光被四表也一日二日萬幾乾乾不息無刻不生機懸密也豈必驗雲物于觀臺得寶鼎于軒后紀連珠合璧之盛致八能五蓋之占云爾哉記曰清明在躬氣志如神者欲將至有開必先故天無私覆地無私載

知不足齋叢書卷二  
日月無私照奉三無私以勞天下夫是以惟動不  
應俟志而申命用休也迎長日之至孰有大于是  
者哉

御製君子以虛受人論恭跋

臣惟山澤通氣不獨澤之體虛山之氣亦虛也蓋  
不虛不能通不虛則所受者亦寡矣況山上有澤  
乎聖人于咸之六爻取象于拇腓股思脢輔各舉  
一體而大象取其全曰虛此天地之全體妙用而  
人之所以合德于天地也蓋太虛者氤氲元氣之  
周流無閒而至虛者中正主靜之受靈无方惟聖

人知之咸恆所以爲下經之首而澤山雷風繼坎離而配乾坤者也咸六爻以人身取象而九四當上下之中曰貞吉悔亡憧憧往來朋從爾思言心體也繫辭傳發明之曰天下何思何慮天下同歸而殊途一致而百慮天下何思何慮推之日月寒暑之往來螭龍屈信之變化精義入神之致用利用安身之崇德極之竊神知化之不可測豈非至虛之妙不可言說乎孔子贊舜曰無爲而治者其舜也與又曰舜其大知也與舜好問而好察邇言孟子曰大舜有大焉善與人同樂取于人以爲善

非至虛無我能若是乎然則以虛受人者必如舜而後能臻其極也

御論喻之于水在瓶滿瓶在壘滿壘而極其量于海善下而爲百谷王又上推其運太空而取則于天至矣咸受之義無以加矣然則爲君之道孰有切要于虛受者乎四海至廣也萬幾至衆也雖然陳于至尊之前而以一人之心思耳目辨之俄頃而不爽聚釐者此亦離婁之難以恃其明而牙曠之難言恃其聰者也然而有道焉莫如致虛虛者無私也無我也常明也常覺也至敬也至誠也無私則

公無我則空常明故照常覺故靈至敬則一至誠  
則神如風雲雷雨之出納乎山澤而不畱其跡日  
月寒暑之變化乎山澤而不尸其功材木寶藏出  
于山而不匱其蘊龍蛟珠貝興于澤而其窺其藏  
豈非虛而受者之應用無窮乎我

皇上智周仁燾山敦澤涵納萬善于幾先如大圓之鏡  
影故能感天地而不應俟志感人心而天下協和  
韜鐸昌言如大禹寬仁好問如成湯明目達聰執  
端用中則有虞之心法也舍己從人知哲安惠則  
放勳之廣運也先天而天不違則乾之健也後天

而奉天時則咸之速也故曰法天于無心體道于無我養心靜則中守心敬則正惟躬行之是以言之親切而有味也抑臣更有進者虛者不自覺其虛日孜孜而不倦矣虛者惟恐其不虛日兢兢而三省矣萬善集于虛而不能盈萬福備于躬而不敢泰其惟聖人乎惟神也不疾而速故受之以恆御製恆以一德論恭跋

臣案繫辭傳三陳九德于恆曰恆德之固也又曰恆雜而不厭又曰恆以一德其繼咸速而申明恆久之義彖曰恆亨无咎利貞利有攸往彖傳曰恆

久也剛上而柔下雷風相與巽而動剛柔皆應恆  
夫疾風不終朝迅雷不終晷何以謂之恆哉聖人  
觀乎坤乾之應乾一索而得女曰巽坤一索而得  
男曰震恆自泰而來九變四而剛上六變初而柔  
下于是雷風相與實乾坤交泰也巽順而震動六  
爻剛柔皆應皆恆久不易之道也而其德則純乎  
一于損之六三發明之曰天地絪縕萬物化醇三  
人行則損一人一人行則得其友言致一也舜曰  
惟精惟一咸有一德曰協于克一曰一哉王心曰  
德惟一動罔不吉德二三動罔不凶中庸曰所以

行之者一也一者何也曰誠也惟誠故不息不息故恆久此日月之所以久照四時之所以久成聖人之所以久于其道而天下化成也

御論以咸爲乾德恆爲坤德其義精矣更以恆久乃日新義尤相足盤銘所以有日日新又日新之說也  
昔在

高宗純皇帝臨御六十年凡一日之起居一歲之順動閱  
時閒歲而誌之若合符契不爽晷刻此

聖人壽考備福之徵若天行地氣之久而信所謂貞夫一  
者也我

皇上紹聞衣德繼序永言

先聖

後聖其揆一也

臣伏願固始終而不渝經煩難而不厭

立不易方德惟貞一重巽以申命而從欲以治游  
雷以修省而爲民致福威之速也恆之久也所以  
克肖乎乾坤而作民父母爲天下君者乎

御製君子以懲忿窒欲論恭跋

臣竊惟損自泰來損下卦乾之九三益上卦坤之

上六是爲損下益上曰損損之大象傳曰山下有  
澤損君子以懲忿窒欲說者謂懲忿如澤窒欲如

山可謂善用損者也有所忿懣則不得其正有所好樂則不得其正懲之窒之所謂絕利一源用師十倍者也伏讀

御諭言逆于心必求諸道小人怨詈皇自敬德不邇不殖若成湯菲食惡衣若大禹挾身心之根芽體性命之健順至矣無以加矣臣謹推而衍之忿如火其顯諸外者易制而藏諸隱者難忘也欲如水其泛濫橫溢者易防而浸潤潛滋者難克也法語之言不惟從而改之異與之言不惟說而繹之說必繹從必改是渙然冰釋怡然理順眞能舍己從人

者也見賢而能舉舉而必先見不善而能退退而必遠行乎其所當行止乎其所當止有不善未嘗不知知之未嘗復行也是真能克己復禮者也故曰損德之修也我

皇上擇義極精意必皆化損益之妙用兼之矣是乾坤之全體也

御製讀皋陶謨恭跋

臣惟皋陶之陳謨也以身修思永爲知人之本又以知人爲安民之本推其行于三德六德謹其幾于一日二日衍其政于五典五禮五章五用上揆

之于天下觀之于民終之曰敬哉有土此萬世帝王之心法治法一以貫之者也

皇上時幾慎憲則天勤民曰可不克艱哉言之知人之明難期安民之效誠切實體要精一執中之旨也天下大矣萬民眾矣欲惠心孚于惠德必審官先以知人人藏其心不可測度也其獻于前席敷奏者孰誠孰僞不逆不億抑亦先覺乎明生于誠公本于空如日之照于上如鑑之懸于堂而妍媸過而不能遁其形枉直射而不能逃其影則哲之道不勞而得而又以修身誠意爲本所謂道遠三

茲者也此理與大學互相發明 臣謹推演

聖意協于六經之精義者若此

御書禹貢洪範恭跋

臣謹案書序禹別九州隨山濬川任土作貢武王  
勝殷以箕子歸作洪範一紀禹治水之績作貢賦  
之則一述禹受洪範九疇敘彝倫以爲民極所以  
平地成天本心出治萬世之大法也我

皇上熟讀而

手書之仰見

聖人之用心通乎天人而切于政本者也 臣惟禹貢定

貢賦以三壤奠山川于四極而彙之曰祇台德先  
不距朕行萬幾豈不密于君心乎舜之稱禹曰克  
勤于邦克儉于家豈非以恭儉爲底慎作民之要  
歟孔子贊禹曰吾無閒然矣菲飲食而致孝乎鬼  
神惡衣服而致美乎黻冕卑宮室而盡力乎溝洫  
此禹恭儉之德飲食衣服宮室俱不以累其心而  
專力于神民至誠而無閒之實心實政也故不言  
利而利及天下也洪範以五事敬五行以八政制  
國用以三德養人才而本于皇極純于一心然則  
君心爲萬事之主矣政莫大于理財用人能恭儉

也堯舜禹湯文武之所以享國長久爲萬世則者也國之大事在祀與戎受天之釐救民之命如是其重且急也可不敬乎可不誠乎敬勝怠者吉至誠而不動者未之有也我

皇上御論闡挾天人之交允爲精渙而明切之至者矣

臣既伏讀而敬繹之尤願

聖人夙夜基命宥密設誠而致行之則惟動丕應徯志錫保極于億兆蒼黎矣培養備福在一心臣民遠邇無能窺測吾之閒隙惟誠意懇惻充塞乎宇宙之閒豈不於萬斯年受天之祐者哉

御製禮與其奢也寧儉論恭跋

臣聞禮之所起以養人之欲給人之求使欲必不窮乎物物必不屈於欲兩者相持而長既得其欲又好其別禮有三本天地者生之本也先祖者類之本也君師者治之本也然孔子答林放之問乃以儉爲本何也孟子以恭儉爲治躬之先老氏以慈儉爲三寶之二豈非以滿損謙益者天之道制節謹度者民之命哉

臣伏讀

御論發明忠信之本而以大禹之勤儉執中爲無閒可爲體要粹精之至矣然而挽末流之習俗致蒼黎

於父安以禮坊民莫如以儉帥先之切實而無弊也豐亨豫大豈不美盛而立隆哉然而天地盈虛與時消息鳴豫介石君子慎幾惟儉則欲易養求易給知稼穡之艱難惜民力之勤苦清明在躬利澤下逮中外貴富之家無敢驕汰作慝以干大順此所以爲寶所以爲本也夫儉非禮之正也而崇禮由禮以治天下者必以是爲先豈非近根之幹近源之流哉

皇上躬行儉德屏玩好于耳目絕言利之端倪傳大禹之心法握宣聖之樞機天下幸甚

御書四箴恭跋

臣聞克己復禮仁也其切要之目則在視聽言動  
視聽言爲耳目口之官動則該乎意與身矣程子  
四箴發明最爲體要是入聖之門而爲己治心之  
學也我

皇上御書于冊而又推其義於君臨天下之法蓋體仁  
足以長人而視遠惟明聽德惟聰惟口出好興戎  
德惟一動罔不吉皆古帝王傳心之要旨也視則  
兼乎色與玩好矣聽則兼乎聲音與出納五言矣  
言則兼乎僉咈渙號矣動則兼乎興作與臨蒞矣

而尤在于一心樞機宥密之間慎之又慎敬之又敬克之于幾復之于獨省以一心與天相應與臣民相見則非禮者無由伺吾之間而入之夫然後所視所聽所言所動嚮明而治天下無不仰之若日月也由四勿之勉而臻四無之安所謂仁也

皇上克知灼見身體力行

臣何由仰贊

聖德歟

御書左傳楚武王侵隨一則恭跋

臣聞忠信者人君所以孚格羣黎而綱紀上下者也聖王以禮宰庶政而必本於忠信易繫辭傳曰

天之所助者順也民之所助者信也履信思乎順  
是以自天佑之然後達乎天民之交通乎幽明之  
故孔子曰使民如承大祭則合而言之義更精矣  
左氏所載諸國賢臣之言最爲近古如季梁云成  
民而後致力于神以民事爲本而以神格爲符知  
所先務矣三禮莫詳於事神豈以繇文而干福哉  
誠知民神呼吸相通而天人聰明相應故曰天視  
自我民視天聽自我民聽又曰我戰必克祭則受  
福其于民也絜其好惡而施措謹之是以惟動不  
應後志不待卜筮有從而無違也我

皇上念切民依而敬事昭格之誠基於宥密秩於胖饗  
眞所謂有嘉德而無違心者自然民和而神福之  
庶徵時敘而四表會極

御書內傳陳之座右若所無逸而繪豳風也抑思列國  
嘉謨嘉猷小用之則小效如隨侯懼而修政楚不  
敢伐者是已其敝在不能設誠而致行之三代以  
後昭鑒灼然未有念茲在茲一誠貫乎萬幾如  
今日者也

御書晉侯歸謀所以息民篇恭跋

臣聞招攜以禮懷遠以德晉楚爭鄭屢矣悼公盟

諸侯于戲鄭未心服也知武子曰我實不德而要人以盟豈禮也哉其克己也忠其責人也恕故曰我之不德民將棄我豈惟鄭可謂知本矣于是晉侯歸謀所以息民魏絳請施舍國無滯積亦無困人公無禁利亦無貪民乃修儉德祈以幣更賓以特牲器用不作車服從給行之期年國乃有節三駕而楚不能與爭遂服鄭而成霸業竊謂春秋列辟惟晉悼最爲近道其用人也六官之長皆民譽魏絳戮其弟之僕而不遷怒用其和我之策而遠人歸城虎牢修德息民而服楚何其正也幾與舜

禹之舞干文王之因壘同功所謂自勝者強治內者無敵也天下豈有民安國治而標末不理心志清元氣固而四肢不喻者哉我

皇上自強不息綱舉目張求民之莫若惻鰥之在己自然時和歲豐而萑苻若振穰而風靡也

御書此篇蓋有會乎德禮不易無人不懷之指而明政刑詰戎兵之道賁焉傳又曰君子勞心小人勞力先王之制也亦可與先憂後樂思艱圖易之義相發明故有取云爾

御書荀勗省事不如清心奏議恭跋

臣謹案西晉時議省州郡縣半吏以赴農功荀勗奏議以爲省吏不如省官省官不如省事省事不如清心其意以清心爲本以省事爲先得其要矣周六官各屬有府史胥徒所謂庶人在官者也蕭曹相漢致畫一之歌皆起家于吏其後吏道雜而多端則官職耗廢然省吏一末也論語曰居敬而行簡以臨其民不亦可乎任官惟賢才左右惟其人是得人乃六計弊吏之要也又曰惟王不邇聲色不殖貨利德懋懋官功懋懋賞則清心爲省官之本也董仲舒曰正君心以正朝廷正朝廷以正

百官端本而末自舉矣清明在躬氣志如神則維  
嶽降神生甫及申自然無曠庶官天工人代我

皇上夙夜宥密以勤萬幾而容揆牧若網在綱矣

御書唐呂溫頌姚崇誠宋司馬光蘇軾著錄一則恭跋

臣惟稽古所以式今資善可以裨政我

皇上好學敏修幾餘博覽于經傳之嘉言旣擇精而識  
要矣又取唐臣呂溫之頌姚崇之誠宋臣司馬光  
蘇軾之著錄選擇而

手書之以備披覽竊窺呂氏天道福謙人生在勤之語  
可得敬天勤民以爲親庶政之本姚崇公平正直

以喻持衡已兼十事責難之要矣司馬光惜時之  
六術遠謀之制保重微于萬幾已賅資治通鑑之  
綱蘇軾除兩職而陳六事卽其進陸贄奏議意也  
自昔名臣納忠建白不在政人之著而在格心之  
微是以言者無迹而聽者沃心抑法語異言不少  
而從改說繹則嘉謀嘉猷取之皆是而惠心惠德  
其益无方矣然舜之大在于樂取善我

皇上千古昔嘉言誠好而揆索之以爲身心之助以端  
政治之原至于若此則天下孰敢不精白一心以  
竭芻蕘芹曝之獻也歟

御製蘇軾刑賞忠厚之至論恭跋

臣謹案此宋嘉祐二年禮部試題歐陽修主試疑其客曾鞏所爲置之第二者也其所云皋陶曰殺之三堯曰宥之三蓋設辭取孟子皋陶執之而已矣王制王三宥之意然推皋陶刑期無刑堯舜刑故無小亦豈有意輕重于其閒哉惟其當而已矣合乎人心準乎天理賞一人而天下勸刑一人而萬民革所謂仁也是忠厚之至也論語曰舜有天德五服五章哉天討有罪五刑五用哉皋陶豈忍

輕人命而曰殺之三以待堯飢法而曰宥之三哉  
軾一時權變之言不以辭害意可也我

皇上大公無我至仁無私賞必當其功而使人知爲善  
之必獲福刑必當其罪而使人知爲惡之無倖逃  
而哀矜惻怛詳慎三復之意猶餘于法外而不能  
自己中心同天厚德如地至誠悠久自然渙入乎  
四海兆民之心而變化于仁壽之德而從欲以治  
也

御製攄誠戒僞說恭跋

臣惟誠者交天人合上下一以貫之道也易曰

无妄又曰中孚天下雷行物與无妄備元亨利貞  
之德天之所以命人也澤上有風中孚信及豚魚  
至誠之所以盡其性以盡人物之性也一有譸張  
爲幻之心則無本之木榮于一時敗于頃刻所謂  
不誠無物也聖人存其誠孰敢以欺妄僥倖于下  
者不待逆詐億不信而先覺之照詢事考言雖有  
其驪之僞不能掩其肺肝矣欽惟我

皇上以誠事天以誠臨臣民而不肖者狃于習之不善  
自謂可以得計而不知其欺天欺人實自欺耳求  
福而取戾弄巧而呈拙不可以爲人矣伏讀

御製存誠戒僞說反覆申明甚矣

聖心之仁也以不能移風易俗自引爲咎仰見

聖心之克己而恕人也爲臣民者孰敢不革面革心百  
讀

聖言而心說誠服哉

御製盛京頌恭跋

臣聞頌之言容天子之德光被四表格于上下無  
不覆幬持載此之謂容于是和樂興焉頌聲乃作  
功大可不美報乎所以顯神明昭至德也我

朝筆道函夏起于

興京

盛京仰惟

四祖

太祖

太宗之功德光烈以篤

天祐

聖祖

世宗

高宗追本王業凡七謁焉我

皇上

世德繼述達孝思遠癸卯之秋

默顙明徵于今二十三年矣

純皇作盛京賦萬口傳誦方平似貢益經陵鑠都京不足  
云

皇上告成功太平德洽不忘艱難諧八音而作八章天  
佑一章言

祖宗開創之義猶清廟對越在天也於鑠一章言受璽承  
基之本猶維天之命嘉以戒愼曾孫篤之也歲建  
一章言水原本本率由舊章之義猶維清緝熙肇  
禋迄用有成也三關一章言

二陵之鬱蔥祀事敬脩猶烈文之繼序其皇前王不忘也  
門煥一章言

大清

崇政之殿基福錫慶猶天作高山太王居邠文王祖  
岐築宮室以爲常居也祀

壇一章言祀壇告廟之典猶昊天有成命郊祀天地我將  
祀文王于明堂也

世德一章言巡典慶成猶時邁之懷柔河嶽也

考賦一章言

純皇賦盛京我

皇上繼繩作頌懷

祖業而承

昊眷猶執競之自成康而追武王思文之溯后稷配天陳

常時夏也

臣

謹案賦者敷陳其事而直言之頌者

美盛德之形容皆非比興之體超乎風雅之正然  
商魯頌作于正考父史克周頌作于周公旦皆非  
王者所自爲也洪惟

高宗之賦我

皇上之頌

聖作

聖述先後合揆則從古所未有也臣竊以周頌清廟之

什遞釋之如此又謹案嘉慶十年七政經緯躔度  
時憲書推今乙丑九月庚戌之朔亥初日月會于  
壽星之角土水在軫火在氏金與歲星在心自辰  
甲寅右旋于西合璧聯珠完完纍纍懸象著明于  
天正當

聖主禮成旋蹕之三日太和嘉祥重光重輪重暉遡于  
一時豈非貞符之懿盛哉信而有徵可不敬歟

御製辛巳歲我

太宗大破明師於松山之戰書事恭跋

臣聞有熊涿鹿之師帝啓扈甘之戰尙矣詩書所稱成湯升陟秉鉞文武臨墉戡黎皆以爲王業所基肇攻艱難之蹟以示後昆不敢忘其祖烈至于漢祖成皋滎陽之鏖兵光武尋邑虎豹之股栗唐太宗雀鼠虎牢之武功宋太祖滁州清流之突陣元世祖錫默圖之追北明太祖康郎山之焚舟此皆赫濯史書流傳眾口以爲天人協心古今爲烈者矣然從未有我

朝肇興東北

太祖

太宗奇功偉業天助人順以少擊衆以一勝千如薩爾赫  
之破明兵二十萬松山杏山之馳六百里敗明師  
十三萬之超前古而燦萬禩者也我

高宗純皇帝旣書事于前矣我

皇上東巡謁

陵出關過錦州跋履其地慨然想見山川因壘艸木殷戈  
白馬嘯風黃旗耀日聖神威勇灑涕濡毫點竄二  
典塗改三頌上配

高宗之巍煥

昭垂奕世之不謨雙懸大文合璧象緯以頌擬賦以書

繼志烈文之詩曰念茲武功繼序其皇之立政之  
書曰以覲文王之耿光以揚武王之大烈億萬年  
無疆惟休可不敬歟

知足齋進

皇文彙卷二